

咸寧長安兩縣續志

咸寧長安兩縣續志卷二十一

列女傳上

兩邑故周豐鎬地文王刑于太姒貞靜入人甚深故其夫婦之情皆篤男女之道亦正訪冊續得以節著者若干人以烈死者又若干人彼豈不知冰蘖之不可茹挺刃之不必蹈哉禮所範圍恥所激盪盡其分所當然而已嗚呼禮也恥也四維之鎡鍵者也背道而馳則變本加厲國底滅亡矣可不懼乎茲所爲於巾幗之行首冠節烈亟亟樹之風聲而惟恐敘之不詳盡也作列女傳

咸寧

節婦

高氏寺坡村薛生蔚妻生蔚服賈南中死於寇高聞訊裹糧覓之扶旅櫬歸葬乾隆丁酉旌并建坊

牛氏寺坡村薛溶妻夫死守志撫孤數十年知縣高廷法旌其門曰金石同貞

李氏東韋兆村趙克興妻年二十二寡守節三十年邑令榜其門曰節茂松筠

劉氏李家堡蔣德明妻年二十二夫亡子俱幼守節撫孤教以義方次子文光道光乙酉科武舉以軍功保守備

魏氏韋兆村諸生梁雲飛妻年二十一夫亡遺田三畝爲債家攫去無所得食母家迫其再醮魏斷指自誓時姑老前室子幼以紡績爲事苦節數十年道光九年旌

賈氏羊健村魏永順妻夫亡賈年二十六子未週歲薄田數畝衣食弗給晝耕夜績撫子成立年七十餘子應第被舉鄉飲孫之鑑爲邑諸生鄉里榮之

李氏附生靳恆妻集瑞繼母也夫死痛不欲生迴顧集瑞等惻然曰有諸孤而不撫何以見夫地下乎乃強起撫子飲食教誨卒至成立道光己丑奉旨建坊

蒲氏金霽霽孫任遠妻年二十六寡生遺腹子矢志撫之卒成立年六十六卒邑令以節孝可風榜其門

王氏韋兆村李天俊妻天俊死王年十九撫遺腹子映庚成立入武庠年七十三卒同治七年學使周蘭榜其門曰金石同貞

羊氏姚家寨儒士楊舒妻年二十一夫亡子方周歲家劇貧或疑其改適羊曰吾翁昆季皆耆儒碩學清白家風肯自我墮乎含冰茹蘖深居不出者數十年同治十一年旌

田氏皇子坡沈秉乾妻生員培心女年二十八寡姑老子稚力任其難守志完貞兼全慈孝

趙氏舉人白友元母年二十七孀哭夫喪明夫死未嘗一櫛髮非至戚不輕與語家貧攜子居母家兄策延師督友元讀卒領鄉薦第一趙年六十有七卒

劉氏樊村邸永齡妻生二子事舅姑孝永齡積學早逝劉年二十二將以身殉母喻以大義始強起任撫孤時兵燹之後繼以饑饉族某覬遺產多方侮之不爲動教二子力振家風年七十歲卒邑人薛寶辰表其墓

楊氏蕭家村武舉蕭萬清妻蕭氏一門同爨者九十餘口楊主持家政翕然以和年二十三寡矢志守節教子姪有法光緒元年旌表子士鐸武生

丁氏新築鎮寇子謙妻生子郁堂甫三歲子謙死守節撫孤供郁堂讀家貧不能卒業改習木工以此致富孫卓舉人官四川巫山縣知

縣孫鴻恩舉人法部主事

劉氏廩生彬華女神峪溝呂際虞妻年二十一寡姑在堂子景防幼躬任事畜茹苦積瘁年五十三卒景防後登賢書官直隸知縣

董氏木匠王村王文貴妻年二十四而寡子僅二齡家無儋石守節撫孤至於成立光緒初年七十餘里人榜其門曰孝慈貞潔

支氏車張溝張鐸妻諸生煥第祖母年二十九夫死守志不貳撫孤成立光緒九年旌

寇氏西戎店白萬有妻年二十八夫亡子二俱幼家貧無以自贍後遷居韋兆村紡績縫紉教子讀書均能自立年六十有二卒光緒九年旌

門氏引駕迴劉紀妻同治初回亂盡室避終南紀旋死門年二十八三子幼賊去歸葬夫櫬紡績教子皆成立光緒十二年邑紳以蒙難

艱貞題其閭

董氏杜曲鎮陳錫孝妻年二十七夫亡二子積善從善俱幼家貧浣濯縫紉爲撫孤計積善年弱冠歿從善以服賈起家孫三長仲謙邑庠生董卒年八十有六

荆氏大峪口謝大利妻大利死力撫遺孤迭經寇亂苦節弗渝子長娶婦已生孫矣忽病歿撫孫成立年七十八卒

鄭氏五臺留村惠學科妻學科地無立錫鄭無怨尤年二十五翁姑與夫相繼逝事姑撫子紡績爲活守節四十六年

康氏春林村曹榮妻年二十八夫死無子兄公似婦皆先榮歿遺子女四人康矢志撫育之女俱遣嫁子一殤一曰章服賈漢南漸致富年七十二卒

崔氏宜川教諭王福臨妻福臨死崔年二十六姑老子幼安貧守節

以浣濯縫紉所得奉姑供子讀卒年七十有八學使葉爾愷爲之請旌

李氏龍渠村田景艾妻年十九寡撫遺腹子武林已娶婦生子而武林又逝復撫孫生華成立卒年七十有四

孫氏狄寨鎮趙廷福妻年二十九夫亡守節撫二子同治二年四月回匪突至次子被擄孫冒死往救賊感其節竟得釋年六十有六卒朱氏呼延某妻年二十六夫死二子俱幼同治間迭遭兵荒守節弗渝卒撫子成立光緒二十六年旌

薛氏名清荷翰林院侍讀學士寶辰女適四川知府李佩銘長子承渠年二十承渠歿誓不改適好讀醫書於幼科頗有領悟年三十六病歿學使沈衛奏旌如例

祝氏董家寨董榮妻年二十八寡子生才數月族人迫之嫁誓不貳

卒撫子成立孫鎮鄰入邑庠卒年七十有八

陳氏徐家寨徐瑞麟妻年二十五夫亡子永順尙襁褓祿薄田數畝環堵蕭然陳矢志靡他撫永順成立永順能孝親里人謂之徐孝子陳卒年七十有三

李氏西戎店村張玉秀妻玉秀死李年二十四家綦貧子九清甫三歲李不避艱苦撫孤成立九清入邑庠光緒二十九年旌

薛氏寺坡村李雁妻年二十五夫亡撫子夢蘭成立夢蘭鬻金石書畫與士大夫遊好善重然諾薛之教也光緒三十一年旌

李氏韓昱妻年二十七夫亡守節五十餘年光緒二十八年旌孫孝忠官秦州營千總

孫氏鳴犢鎮李廣林妻年二十一寡宣統三年七十七歲生平好善常傾數十年積蓄修祠廟賑饑困有善人之稱

惠氏上寨村王守貞妻同治二年守貞死回難惠年二十七家貧子幼傭工度日撫孤成立光緒二十二年旌守節三十六年

劉氏下灣村傅文儀妻同治二年文儀以鄉團禦回匪死焉劉年二十八誓死守節奉姑撫子始終不渝光緒二十五年旌

田氏深渡村王九合妻同治間夫亡家貧立志不嫁勤儉撫孤光緒二十八年旌村人敬其節額其門曰苦節冰霜

鄭氏曹家廟曹相周妻年三十六夫亡家酷貧子六人以養以教皆鄭紡績是賴均成立光緒二十七年旌准入節孝祠

王氏孫翰妻事舅姑孝年二十七孀時方娠忍死以活奉親撫孤長子詒謀光緒癸卯副貢甘肅直隸州州判次子楸四川候補知縣署遂寧縣事女適趙遺腹所生光緒三十二年旌

雍氏木匠王村王安邦妻年二十一夫死矢志撫遺孤同治初家人

俱死難雍負子避賊備歷艱險卒年七十有六

高氏生員炳南女夾河灘楊懷仁妻年二十三夫死姑年逾古稀子甫周歲誓不貳志孝姑撫子卒年七十有一子蓀以院試第一入庠何氏引駕迴解思成妻同治初寇亂思成死焉何時年二十九遺四子俱幼家貧甚里人勸再醮則悽然曰我去數子危解氏宗祀不血食矣哭數日損一目攜子乞食度日後皆成立光緒三十四年旌

劉氏白家堡白應祥妻光緒十年夫亡守節二十八年旌子茂叢等由武備學堂畢業爲母立碑誌其節

王氏引駕迴姬長庚妻年二十三寡子才七歲母家欲奪志王斷指誓死守節宣統元年旌

孫氏藍田員外郎錫堂女附貢生樹森姊歸盧樹椿年二十七夫死矢志守節撫孤成立卒年四十有五

董氏引駕迴屈正璽妻年二十八夫亡子三俱幼守節撫孤不以艱
窶易其操宣統二年旌

崔氏棗園村溫應祿妻年二十一寡子生僅六月家赤貧紡績織履
爲活撫子成立宣統二年旌

田氏北留村何悅美妻悅美死田年二十五子甫數月誓不改適事
衰姑凡三十載姑年八十五歿家雖貧喪葬如禮卒撫孤成立年七
十四卒

陳氏大雁塔村廩生古道成妻年二十五夫亡欲以身殉念翁姑在
堂遺孤四歲矢志守節力任艱苦卒年五十有七提學使余堃旌其
閭

張氏高橋鎮諸生李繼善妻年二十八夫以避亂死於外矢志守節
孝親撫孤子宴春縣學增生年七十卒

梁氏余家村余凌霄妻年二十五寡撫子寶恕誓不他適家貧以紡績供子讀同治庚午鄉試寶恕中副車守節五十餘年

王氏西馬旂寨朱永壽妻年二十四夫死遺孤僅二歲祖姑暨姑兩世孀居均在堂王仰事俯畜備嘗艱苦迨子成立王猶康健恆於通衢施茶湯以爲樂宣統三年年七十有三

李氏伯夷坊封之屏妻延川訓導一善女年二十四寡守節事翁姑撫孤成立子華三由附貢生議敘中書科中書宣統三年年七十

王氏東高村劉嗣志妻年十九夫亡子甫周歲或憐其貧諷之嫁王毅然曰有我可撫兒有兒可奉祀貧何恤焉績紡撫子至於成立宣統三年年六十八

劉氏姚萬株妻年二十六夫亡姑老二子幼家綦貧矢志守節子漢勛入邑庠建勛操商業宣統三年年六十有七

張氏北留村陳漢林妻漢林爲武進士奇策孫漢林死張年二十七子二長五齡次周歲守節撫孤宣統三年年六十有六

薛氏名青蓮寺坡村歲貢生宗周女諸生戴憲章妻生子二女二年二十六夫亡憲章叔逼令改適以死自矢卒撫二子成立遣二女嫁宣統三年年六十有六

權氏灣子村王章妻年十九寡遺孤僅六月矢志守節事翁姑撫孤子艱苦備嘗爲子娶婦子又生子矣宣統三年年六十有二

趙氏上塬村王忠孝妻忠孝死趙年十九安貧守節以績紡養翁姑撫孤子子旣授室而歿復撫姪成立宣統三年年六十有一

姚氏高村楊向義妻年二十一夫亡遺一子癡舅姑及兄公遇之虐逼令他適姚矢志守節析爨而居癡兒長授室洎生子而癡兒死又撫孫成立宣統三年年六十有一

楊氏張家坡武生張振邦子致長妻年十九于歸未逾年致長死生遺腹子姑李氏旋病歿勸翁續娶翁不可楊曰翁雖有孫但孱弱恐未可恃耳翁喻其意娶杜氏生二子旣而翁及繼姑相繼逝楊撫子及二夫弟均成立宣統三年年六十歲

田氏上雙寨劉玉堂妻年十七玉堂死告親族曰我娠已數月幸而生男劉氏宗祀可延也矢志不嫁終身事親彌月果生男撫孤守節至老不懈

張氏神鹿莊李永秀妻年三十而寡悲痛幾絕念諸孤尙幼矢志守節連遭歉歲備歷艱危教養二子各底於成宣統三年年六十歲

孫氏金霽霽朱匡心妻年三十八夫死有三子繼姑逼再醮遇之虐孫志不爲奪季子泗哲出嗣家較裕乃迎母孝養焉宣統三年年五十有八匡心爲明秦藩永壽王十六世孫

范氏曲江池譚元德妻年二十五夫亡撫二子成立長者赴甘肅絕音問次子尋其兄亦不歸范破屋一間薄田三畝終無異志宣統三年年五十有七

王氏焦村武生田奪魁妻姑趙病篤王斷指和藥以進姑果愈年二十七奪魁死守節事親撫育子女宣統三年年五十七

沈氏馬嘶坡惠興金妻年二十六夫亡子方四齡晝耘夜績艱苦撫孤子霖溥入邑庠宣統三年年五十有七

薛氏寺坡村贈資政大夫桂榮女長安諸生高棫牲妻年二十四夫咯血死守節撫子女子早殤女適華陰諸生負述千宣統三年年五十有七

盧氏大兆村傅士恭妻士恭客外不返時盧年二十六薄田僅二畝盧事翁姑及寡嫂又撫二子雖貧不渝志宣統三年年五十有七

局寧長安兩縣志卷二十一
郭氏澇巷張鳳鳴妻年二十四夫病歿子一女二家極貧恃十指爲生活薪米貴輒斷炊郭堅苦撫孤不改其常宣統三年年四十有五康氏曹家廟仲銀妻于歸時夫家劇貧常無隔宿糧康孝姑敬夫晏如也越三年姑病歿哭之失聲年三十二夫亡有子三長鈞方十三歲次鎰次鎬俱幼守節撫孤不以貧廢子讀鈞儒鎰力田鎬精醫術宣統三年年五十有七

栗氏灣子村張學禮妻學禮死栗年二十六守節撫孤光緒三十年旌宣統三年年五十有六

王氏春林村楊天祿妻年十九于歸結褵後天祿遊漢南八年始歸生一子又外出病歸尋歿王守節事舅姑撫孤子宣統三年年五十有五

劉氏鄂公店雍志元妻年十九夫亡生子僅三月事姑撫子矢志不